

S RAETS

MERKWAERDIGHE SLITINGHEN

III. 1414—1423.

(Veroolg van bladz. 104).

1414. **W**ant Willem Kroec, Gheryt Kroken soen, in syn aensicht gheworpen wart, des hi daerom bi nacht over manslaep, den knecht, die hem dat dede, in Sinte Pauwels gasthuse in den bedde, daer hi naect lach, overvallen, ghetreden ende gheslegghen heeft, daerom heeft hi opt vleyshuys ghelegghen, ende is hier ghecomen in hemde ende in broec ter clocken, ende sel den rade verghiffenisse bidden ende sel der stat te beteringhe gheven xx^m steens (51).

— Want Willem van Luenen met Johan Martens soen, die Johan Wedighen, binnen onser stat moerdadelic bi nachte doetstac, ghecomen is, ende gheselschap met malcanderen ghemaect hadden, ende daerbi gheweest heeft, ende dat ghehoert ende ghesien heeft, dat Johan Wedighen alsus doet ghesteken is, ende Jan Martens soen daer inne ghestarct heeft ende bi hun ghebleven ende met hun van daer gheghaen, ende Johan Martensz oec ghewaernt heeft, dat hi hem wech pinen soude,

want Jan Wedighe doet was, ende Willem oec voersz. Jans Wedighe hoyke ghenomen heeft, daer hi sus doet lach, ende de wech ghebrocht ende versteken heeft, daer hi woude. Ende want Willem voersz. desen moert nyet wtghebrocht en heeft, alst voer openbaerlic ter clocken gheboden ende ghecundicht is, ende Willem voersz. oec hierenboven binnen onser stat ghecomen, voer Jan Wedighen, des doden broeders doer, ende Jans Wedighen broeder anghesproken, in deser manieren; *kendi den man, die daerbi was, dat v broeder doet ghesteken wart?* Ende vraechden hem mede, wat hi hem doen woude, of hien saghe. Des de broeder antwoerde, hi en wists nyet, twaer hem hart te liden. Des Willem voersz. seide: *Wat woudi hem doen?, ic ben den man.* Voert heeft Willem voersz. beliet, dat hi met *wilden wiven omme gheghaen heeft, ende daer van marcte te marcte mede ghetoghen heeft, ende mit quaden teerninghen ghespuelt, ende met voerdeel den luden hoer ghelt of ghewonnen heeft, daeromme sel men hem rechtevoert wt-leiden ende dat rechten metten sweerde aen syn lyf* (52).

1414. Want Herman Stael een medekyn, *dat van Cortehoeve ontfoert was, ende in Goylant ghebrocht was, voert heeft helpen voeren ende versteken, dat nu weder bi sinen ouderen ghecomen is, daerom heeft hi opt vleysluys gheleghen, etc.* (53).

— Want Salomee, Eerst Gheyline x soens wyf,

Hildegonden, Jacob Wouters soens wyf, ghewacht heeft, ende met enen cluppel Hildegonden voern, ende Alyt haer suster seer gheslegghen heeft, boven dat haer beider mannen voersz. met malcanderen in vreden stonden, daerom is Salomee voersz. hier ghecomen vanden vleyshuse bloets hoefts voerder clocken, ende sel den rade verghiffnisse bidden ende Alide vi gl., ende Hildegonden i gl. voer haer smerten, ende onser stat te beteringhe gheven voer haer bruecken xv^m steens (54).

1416. Want Ghertrwt, Wouters dochter van Weede, ghecomen is mit haren vrenden ende maghen voer onsen rade ende heeft den rade gheclaecht ende ghecroent, dat die personen nabescreven ghecomen syn binnen onser stat vriheyt aen onser stat weyde, ende hebben Ghertruden voersz. tot haren ondanc crachtelic ontfuert, ende tot haren wederwille, alsoe si haer noch beclaecht ende bi haren claghen bliven wil, daerom ghebiet die raet den personen nabescreven, dat si hierop voer onsen rade ter antwoert comen willen, soe hebben si een goet vri gheleide, veilich te comen ende te scheiden van alle saken, ghesondert van deser saken voersz., daer sellen si onser stat recht van wachten. Dit syn die personen voergen., etc. (55).

— Marten van Alpen, die teernincmaker, verbiet men die stat drie jaren lanc, om onredelike teerninghen, welke hi ghemaect heeft (56).

1417. Want Willem Droechschoot ende Wouter Woutersz, die men heet Woytkyn die Pyn-

re, grote onsedicheit in Blidenstein bedreven hebben ende Woytkyn, Lam Kyes ghewont heeft, daerom syn si voer der clocken ghecomen in hemde ende in broeke ende sellen den rade verghiffenisse bidden, ende hebben ghewilcoert, waert, dat si tot enighen tyt, enighe onsedicheit bedreven, dat si dan een maent lanc legghen sellen beneden inden roden toern ende eeten water ende broet (57).

1418. Want Arentkyn op vrouwen ledich ghegaen heeft ende prurietscap te doen pleecht ende menighe andere boeverien ghedaen heeft, daerom sel men t'after eeten gheselen ende sel t'avont bider sonnen wt der stat gaen, ende die raet verbiet hem vyftich jaer die stat, ende een mile vander stat te wesen op syn lyf (58).

— Want Matheus Campert grote loghentale selve fisiert heeft over heren, goede mannen, daer hem ende onser alingher stat groten last off comen mocht, daerom heeft hi langhe opten roden toern ghelegghen, ende is hier ghecomen, etc. (59).

— Want Hannekyn van Bunnic bi Michiel Jans soen lach, ende na bi Willem Byel oec lach, ende si daerbi was, daer Willem, Michiel doet stac om deser saken wil, daerom verbiet men haer die stat v. jaer lanc, ende en sel men ghenen nyen heer incomen (60).

— Op Sinte Jans kerchhof is bi nacht een man ghedronghen, dat hi een boff blasen most enen anderen man, of men souden ghesteken ofte mishandelt hebben, daerom ghebiet die raet enen

yegeliken, die dit ghedaen heeft, dat hi bi onse oversten come ende hem des belie, of die raet wilt swaerliken aen hem rechten tot horen goetduncken, of syt daerntendens ter waerheit bevonden (61).

1418. Want Dirc van Oestrum Dircs soen, een medekyn, dat om syn boetscap ghinc, onredeliken aenvoer, daer een goet man om des ghe-rufis wil, den medekyn te bescutten ende te hulpe quam, des die goede man doerghesteken ende gheworpen is, ende seer mishandelt, daerom heeft Dirc van Oestrum in onser stat vanghenisse gheleghen, ende is hier ghecomen in hemde ende in broec ter clocken, ende sel den raet verghiffenisse bidden, ende den goeden man beteren biden rade vander stat, ende Dirc sel wilcoeren, waert, dat hi ummermeer onstantelike saken bedreve, dat hi dan een jaer lanc beneden inden roden toern legghen sel ende eeten water ende broet (62).

1419. Ave, Henric Kokentrys dochter, verbiet men die stat vyf jaer lanc, om dat si enen onredeliken aenspraec enen knaep ghedaen heeft, dat hi se vercraft hadde, des si niet bewyst en heeft, ende de raet anders ter waerheit ghevonden heeft; ende waer yemant van Aven vrienden ofte maghen, die hierenboven, hierom den knaep voersz. misdeden, met woerden noch met werken, dat woude de raet swaerliken aen hem rechten (63).

1420. Want Splinter Hermansz, enen man syn wyf ghenomen heeft, ende den man boven ver-

bot 's raets daertoe in sinen huse in enen kraem ghewont heeft, daerom heeft hi een half jaer beneden inden roden toern ghelegken, ende is hier ghecomen in hemde ende in broec ter cloc-ken, ende hi sel den rade vergiffenisse bidden, ende hi sel wilcoeren, waert sake, dat hi den man syn wyf weder nam, of hem die te schanden maecte, of den man sloeghe of misdede, of enighe onstantelike saken bedreve, dat men dat rechten sel aen syn lyf (64).

1420. *Want onse raet ter waerheit ghevonden heeft, dat Jan van Andernach, boven, dat hi onsen rade toegheseit hadde, dat hi Willem vander Luchten ende sinen geselschap niet en teghe, ende hi daerenboven, sonder bruecke, Willem vander Luchten, van afteren ghesteken heeft, daer Willem aen ghestorven is, ende die raet dat daerom voer een openbare ondaet houdt, daerom verbiet men Jan van Andernach die stat ende een mile vander stat te wesen ewelic op syn lyf (65).*

— *Want dwase Hanne, t Sunter Claes, syn cleder te versetten ende te verdrinken pleecht, om cleyn gelt, daerom verbiet die raet enen ygheliken, dat nyemant Hannen cleder en cope of pande en neme, want se de raet sonder ghelt weder ghegheven willen hebben (66).*

1421. *Want Lisebette, Jans dochter, ende Kleyn Grietkyn mitten handen, boven verbot 's raets in der kerken hebben gaen bidden ende onredelike woerden daertoe ghebesicht hebben, daerom verbiet men elke die stat een jaer lanc (67).*

1421. Want Evert Slotmaker, die beswect is van Sinte Cornelis, boven verbot 's raets in de kerken bidden gaet, ende voer der lude stoelen staende blyft, thent hi daer vallet, daerom verbiet men hem die stat, een jaer lanc naestcomende ende een mile vander stat (68).

1422. Want Werner Jacobsz, die Molenaer, boven verbot ons Heren, ende ons raets, die clocken ende dat loet mede genomen heeft ende die kerke beroeft heeft; voert, want Werner voersz. tot veel tyden Gode smetenisse ende onweerde bewyst heeft, ende enen crwsten penninc Gode te schennisse ende den duvel te eeren doersteken heeft, daerom sel men rechte voert wleiden ende dat rechten metten sweerde aen syn lyf (69).

— Meyster Herman van Culen, is onser stat meyster vanden hoechsten recht, dien daerom smetenisse van sommighen ghesciet, met woerden ende met werken. Hierom verbiet de raet enen ygheliken, dat hem nyemant en misdoo noch misdoen en laet van synen kynderen, met woerden of met werken, want die raet dat scerpelike aen hem rechten wil ende ander kynderouderen, die dit doen (70).

— Gherytkyn van Gornichem heeft ghebeden sonder swcte van Sinte Cornelis ende van den hilighen bloede, daerom sel hi opte kaecstaen, ende men sel hem teykenen met enen brant in syn aensicht, ende daerentendens wter stat wesen hondert jaer ende een mile vander stat (71).

1423. Want Mette Schaberts haer *verwilcoert heeft*, gheen gheselschap te hebben met Ghise Sluteman, of si soude den steen draghen, ende vyf jare wter stat wesen, ende die raet ter waerheit ghevonden heeft, dat si daerenboven dicke met Ghise gheselschap ghehouden heeft, daerom verbiet men haer die stat 15 jaer lanc, ende een mile vander stat te wesen; ende quame si tot enighen tyt binnen der stat, so sel si den steen draghen (72).

— Want Willekyn, Ghise Floren meecht, *onreckelic ende onredelic gheleeft heeft* met Ghise Floren, ende met Hanckyn, sinen wive, daerom verbiet men haer die stat, ende een mile vander stat te wesen twe jaer lanc, ende si en sel met onsen nyen here niet incomen (73).

(Het vervolg hierna).

J. J. DODT v. FL.